



**ATASSUT**

**UPA14/155-1**

**Knud Kristiansen**

**23.04.2014**

**Kalaallit Nunatsinni efterskolimik allisitamik, Tasiilami inissineqartussamik, 2015-imi pilersitsinissaq pillugu Naalackersuisut siunnersuusiornissamik peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Harald Bianco, Inuit Ataqtigiit)

Tasiilami efterskolimik allisitamik pilersitsisoqarnissaanik Inuit Ataqtigiit sinnerlugit Inatsisartuni ilaasortap Harald Biancop siunnersuutaa ATASSUT-mit soqutigalugu nalilersoreerlutigu imaattumik oqaaseqarfigissavarput:

Soorunami inuusuttortatta meeqqat atuarfiannit qimatserlaat ilinniagaqalernissaminnut sakkussaminnik annerpaanik pissarsisimallutik ilinniakkamik aallartitsisinnaanissaat tamatta tamavitta aqutissiuusseqataaffigissallugu soqtigisariaqarparput.

Ajoraluartumik nassuerutigisariaqarparput inuusuttut meeqqat atuarfiannit naammassisut ilinniakkamillu aallartitsisanngitsut aarlerinaannartumik amerlammata, pinngitsooratalu tamanna aaqqiiviginiarlugu iliuuseqartariaqarpugut.

ATASSUT-millu salliullugu suliarerusupparput meeqqat atuarfiannit naammassisut ilinniagaqalernissaminnut sakkussaminnik pissarsilluarsimallutik inuusuttut ilinniarfiini piaartumik ilinniagaqarlutik aallartissinnaanissaat qulakkeerneqarnissaa.

Atuarfitsialaap ingerlanneqarnera ATASSUT-mit malinnaaffigaarput soqutigalugu, kissaatigeqaarpummi inuusuttortavut atuagarsornerinnakkuunngitsoq aammali inuttut inerisimalluarlutik namminneq imminnut akisussaaffiginnerminnik ilikkarluarsimallutik meeqqat atuarfiannik qimatsisarnissaat, taamaattoqarpummi aatsaat ilinniakkamik aallartitsinissaminnut piareersimassusaat qaffasissumik pitsaassuseqassammat.



## ATASSUT INATSIARTUNI

---

ATASSUT-mit poortuinata oqaatigissavarput inuusuttorpassuit meeqqat atuarfiannik qimatsigaangamik efterskolernermik Piareersarfimmiluunniit neqeroorutaasunik aqquasaarsereernermik kingorna aatsaat ilinnialertarnerat kingusigigatsigu, uagullu kissaatiginerpaavarput inuusuttut ilinniarfiini sapinngisamik ingerlaannaq aallartittassasut.

Soorunami efterskolit Piareersarfiillu periarfissaajuassapput, taakkuli tassaasariaqarput ilinnialernissamut naammaginantumik meeqqat atuarfiannik naammassinnissimanginnermi piginnaangorsarfiit, ullumikkulli pinngitsoorani aqqusaagassatut isigineqarnerat nalinginnaaleriartormat ATASSUT-mit kissaatigaarput siunnerfilimmik nalilersueqatigiissasugut.

ATASSUT-mit assut uggorisatsinnik Inatsisartut upernaq manna ataatsimiinnissaannut siunnersuutigigaluarparput 11. klassep neqeroorutigineqaleqqinnissaa aqqutissiuunneqaqqullugu meeqqat atuarfiat pillugu peqqussutip allanngortinneqarnissaa Naalakkersuisut sulissuteqarnissaannik peqquneqassasut, ajoraluartumilli siunnersuuterput taanna Inatsisartut Siulittaasoqarfiannit tunuartinneqarpoq.

Tamannali uniffiginagu ATASSUT-mit pimoorullugu sulissutigeqqissavarput 11. Klassip neqeroorutinngoqqinnissaa, naliliinerpummi malillugu inuusuttut tassani inuttut inerisarnerminnut imaluunniit atuagarsornerminnut atatillugu nukittorsartariaqartut neqeroorfigineqarunik isumannaannerpaajussaaq, taamaaliornikkut meeqqat atuarfiannik naammassinnilluni qimatsisartut amerlanerpaat inuttut atuagarsornikkullu aammalumi assassornermik ilinniagaqarnissaminnik pilersaaruteqartut annertunerpaamik sakkussaannik pilersueqataasoqarsinnaammat.

Taamatut pingaartitatsinnik erseqqissaateqareerluta ATASSUT-mit naliliivugut Nunatsinni Efterskolit pioreersut aammalu Piareersarfiit atorluarlugit inerisarlugillu inuusuttunut ilinniagaqalernissaminnut inuttut inerisimassutsimikkut aamma/imaluunniit atuagarsornikkut piginnaasamikkut qaffassaasariaqartunut periarfissat annertusarneqarnissaat peqataaffigerusunnerullutigu, matumani aamma innersuussutigissavarput Naalakkersuisut akissuteqaamminni ersersitaat, tassalu siunnersuut manna taamatut ilusilerlugu akuersaarneqassagaluarpat aningaasatigut malitsigisassai annertoorujussuummata.



## ATASSUT INATSISARTUNI

---

Taamatut oqaaseqaateqarluta ATASSUT-mit nalunaarutigissavarput Naalakkersuisut akissuteqaataat tusaatissatut tigugatsigu.